



## MUNYATUL MUSOLLI

(Cita-Cita Orang Yang Bersembahyang)

### 12 HURAIAN KESEMPURNAAN SEMBAHYANG

1. [Adapun] **ilmu** itu, atas 3 wajah:

**Pertama:** Bahawa diketahui fardhu daripada sunatnya kerana bahawasaya sembahyang itu tidak sah melainkan diketahui akan kaifiatnya.

**Keduanya:** Diketahui barang yang ada pada wudhu'nya daripada fardhu dan sunat. Maka demikian itu syarat pula sah wudhu'nya, dan

**Ketiga:** Mengetahui akan tipu daya syaitan supaya dapat ia menjauh akan dia.

2. Maka adapun kesempurnaan **wudhu'** itu hendaklah dikerjanya tiga perkara:

**Pertama-tama:** Engkau sucikan hati daripada khianat dan hasad dan **bughd** (بغض - benci), dan

**Keduanya:** Engkau sucikan badan engkau daripada dosa, dan

**Ketiga:** Sempurnakan basuh pada anggota wudhu' dengan sempurna, dengan tiada berlebih-lebih.

3. Adapun **pakaian** itu, maka sempurnanya itu dengan tiga perkara:

**Pertama:** Bahawa ada ia halal, dan

**Keduanya:** Suci daripada najis yang tiada dimaafkan, dan

**Ketiga:** bahawa ada ia muwafaqah dengan sunnah, dan jangan ada pakaiannya itu atas jalan takabbur, dan ujub, dan megah.

4. Adapun memelihara **waktu** itu, maka sempurnanya di dalam tiga perkara:

**Pertama:** Bahawa ada ia mata engkau melihat akan matahari, dan bulan, dan bintang, dan engkau amat-amatikan dia bagi hadir waktunya, dan

**Keduanya:** Telingamu itu mendengar kepada bang (azan), dan

**Ketiga:** Hati kamu memikirkan janji-janji bagi waktu.

5. Adapun mengadap **qiblat** kesempurnaan di dalam tiga perkara:

**Pertamanya:** Bahawa engkau hadap qiblat dengan dadamu, dan

**Keduanya:** Bahawa engkau hadap kepada Allah dengan hati kamu, dan

**Ketiganya:** Bahawa engkau khususy', dan tawadhu', dan **tazallul** (تذلل - menghinakan) dengan anggotamu.

6. Adapun **niat**, maka kesempurnaan itu tiga perkara:

**Pertamanya:** Bahawa engkau ketahui apa sembahyang yang engkau dirikan, dan

**Keduanya:** Bahawa engkau ketahui bahawasanya engkau berdiri di antara hadapan Tuhanmu dan Ia melihat akan dikau. Maka engkau berdiri dengan **haibah** (هيبة - takut) dan **sakinah** (سكينة - tenang), dan

**Ketiga:** Bahawa engkau mengetahui bahawasanya Ia mengetahui akan barang yang di dalam hatimu. Maka selesaikan olehmu daripada membimbangkan pekerjaan dunia.

7. Adapun **takbir** itu, maka kesempurnaannya di dalam tiga perkara:

**Pertamanya:** Bahawa engkau takbirkan sebagai takbir yang sohih, lagi **jazam** (جزم - yakin ia sohih)

**Keduanya:** Bahawa engkau angkatkan dua tangan berbetulan dua telinga, dan

**Ketiga:** Bahawa adalah hati engkau hadir. Maka engkau takbir dengan **ta'zhim** (تعظيم - membesarkan Allah).

8. Adapun **qiyam**, kesempurnaannya itu di dalam tiga perkara:

**Pertama:** Engkau jadikan matamu itu pada tempat sujud kamu.

**Keduanya:** Bahawa engkau jadikan hati kamu itu kepada Allah, dan

**Ketiganya:** Bahawa jangan berpaling ke kanan dan ke kiri.

9. Adapun kesempurnaan **qiraah** (قراءة - bacaan) itu, tiga perkara:

**Pertama:** Engkau bacaan yang sohih dengan **tartil** (ترتيل - tajwid) dan ketiadaan **lahan** (لحن - salah baris).

**Kedua:** Engkau baca dengan **tafakkur** (تفكر) dan **tadabbur** (تدبر) akan maknanya, dan

**Ketiga:** Bahawa engkau amalkan barang yang engkau baca itu.

10. Adapun kesempurnaan ruku' itu, pada tiga perkara:

**Pertama:** Bahawa engkau ratakan belakang serta lehermu. Maka jangan engkau merendahkan dan tinggikan kepalamu.

**Kedua:** Bahawa engkau hantarkan dua tapak tanganmu di atas dua lututmu, dan engkau jarangkan antara anak jarimu.

**Ketiga:** Bahawa engkau toma'ninahkan ruku', dan dibaca tasbih serta ta'zhim dan ketetapan.

11. Adapun kesempurnaan **sujud**, tiga perkara:

**Pertama:** Bahawa engkau hantar dua tanganmu berbetulan dengan bahu.

**Kedua:** Hendaklah engkau renggangkan dua lenganmu daripada dua lambungmu (bagi lelaki), dan jangan kamu hamparkan keduanya kepada bumi.

**Ketiga:** Bahawa engkau toma'ninahkan pada sujudmu dan mengucap tasbih kamu serta ta'zhim.

12. Adapun kesempurnaan **duduk** itu, di dalam tiga perkara:

**Pertama:** Bahawa engkau duduk atas tapak kakimu yang kiri dan engkau dirikan kakimu yang kanan jika tahiyat awal. Dan engkau keluarkan yang kiri di bawah betis kakimu yang kanan pada tahiyat akhir.

**Keduanya:** Engkau tasyahhud dengan ta'zhim dan engkau solawat akan Nabi (ﷺ) dengan sempurna solawat, dan akan keluarganya, dan sahabatnya.

**Ketiga:** Engkau doakan dirimu dan bagi segala Mukminin.

13. Adapun kesempurnaan **salam** itu:

Bahawa engkau salamkan dengan sempurna bahawa ada ia serta niat yang sebenarnya, dan salam engkau itu akan orang yang ada pada kanan engkau daripada Malaikat, dan Mukminin, dan Jin, dan Manusia. Demikian lagi pada kiri.

14. Adapun kesempurnaan **ikhlas** itu, tiga perkara:

**Pertama:** Bahawa engkau tuntutan dengan sembahyang itu dengan keredhaan Allah dan jangan engkau tuntutan akan redha manusia.

**Keduanya:** Bahawa engkau lihat akan taufiq itu daripada Allah, dan

**Ketiga:** Engkau memelihara dia (ikhlas) hingga hilang dirimu dengan dia.